



STINAPA TA INFORMA

MISS PRO-NATURALESA

Apesar di tin mayornan i un welo masha konosí, Lily-Ann Domacassé riba su mes a sa tambe di buta su stèmpel komo artista den komunidad boneriano. El a partisipá na i gana diferente konkurso di beyesa i durante su estudio di sekretaria di direktiva na Hulanda e tabata duna hopi presentashon di baliamentu di salsa. Aunke e ta okupá ku su yu muhé Tiffany i su trabou na banko, ainda e ta traha tempu pa su bida artistiko. Den e grupo folklórico 'The Ginies' e ta deleitá regularmente turistanan na hotèlnan lokal. Lily-Ann ta rekordá su tempu di estudio na Hulanda. E tabata sintié asina orguyoso ora su koleganan hulandes-europeo tabata gaba nan fakansi na Boneiru. Kon nan tabata konta di e bunitesa bou di laman. E ta sigui konta kon orguyoso e ta di kon limpi nos laman ta i kon bèrdè nos paisahenan ta. Ounke su 'opa' tabata un konosido instruktur di sambuyá, nunca e mes a sambuyá. Pero sí e sa di disfrutá di e solo i dor di djis sinta den e laman i gosa di e zonido. E ta relah'é completamente. "Mi lugá favorito den naturalesa boneriano? SERU LARGU!" e ta kontestá mesora, ora puntr'é su lugá mas stimá den naturalesa boneriano. Lily-Ann ta splika ku for di ei riba bo ta mira kasi henter e isla i speshalmente kon bèrdè e ta den temporada di yobida. Lokual tambe e gusta ta e bientu ku ta supla ei riba i tur e matanan ku ta rondoná bo. Lily-Ann ta bisa di ta konsiente ku e turista ta bini netamente pa nos naturalesa. I ta nan ta esunnan ku ta trese entrada pa nos ekonomia. Lo ta bon si bini kampañanan di motivashon pa mas di nos hendenan lokal siña konosé e bida bou di laman. Ya nos mes por papia mas over di dje. "Nos tur tin ku siña konosé nos naturalesa i su balor mihó!"

Skirbí pa Natalie Wanga.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURALESA



Traha huntu na un desaroyo duradero pa Boneiru